

**XI**

AD LEVCONOEN

*Asclepiadeus maior*

Tū nē quaesieris, scīre nefās, quem mihi, quem tībī  
Fīnem dī dederint, Leuconoē ; nec Babylōniōs  
Temptāris numerōs. Vt melius, quidquid erit, patī !  
Seu plūrēs hiemēs, seu tribuit Iuppiter ultimam,

Quae nunc oppositīs dēbilitat pūmicibus mare  
Tyrrhēnum, sapiās, vīna liquēs, et spatiō brevī  
Spem longam resecēs. Dum loquimur, fūgerit invida  
Aetās ; carpe diem, quam minimum crēdula posterō.